

# Pro Svizra Rumantscha

Catarina Morscher è nova presidenta

■ (anr/gc) Cun **Catarina Morscher, Val Flex/Sur**, ha la Pro Svizra Rumantscha (PSR) survegnì l'emprima dunna sco presidenta. Ella daventa successura dad **Arno Berther, Tujetsch**, ch'è sa re-tratg suenter 12 onns. Sco suprastants èn vegnids confermads per il proxim trienni: *David Carigiet*, Glion; *Uorschla Natalia Caprez*, Ftan/Cuira, ed elegids da nov: *Flurin Bundi*, Sagogn, e *Maurus Blumenthal*, Ruschein. Els dus remplazzan *Urs Zingg* ed *Annalisa Schaniel* ch'han demissionà durant la perioda d'uffizi. Sco revisurs da quint èn vegnids reelegids *Carl Caflisch* e *Francescg Cajacob*.

*Catarina Morscher*, che studegia da veterinaria a Turitg, è la terza presidenta da la PSR, fundada 1992 – suenter che quella è vegnida presidiada davent da lura fin 2001 dad a. cuss. *Toni Cantieni*, Lai, e suenter dad *Arno Berther*.

L'intent primar da la PSR è stà la realisaziun dad ina gasetta rumantscha dal di, quai ch'è succedi 1997 cun La Quotidiana. Suenter è la PSR s'engaschada cun diversas acziuns sco uniun surregiunala per far punts tranter Rumantschs e Rumantschas en il Grischun ed en la Bassa.

## Gi success cun il champ 2012

Dapi tschintg onns è la PSR sa concentrada – sco activitad principala – sin realisar la stad champs da vacanzas per uffants rumantschs da diversas regiuns e si da la Bassa. L'emprim èsi stà champs da teater, il davos 2011 a Savognin, cun pitschna frequenza. L'onn passà è vegnì arranschà a Tujetsch in champ da vacanzas da «lavar aur e tschertgar cristallas» e quai cun 25 participants. Quest onn succeda là il medem dals 14–19 da fanadur. Già han ins 20 annunzias.

Success ha la PSR era pudì registrar



La nova presidenta, **Catarina Morscher**, ha surpiglià il presidi da la PSR dad **Arno Berther**.

MAD

cun ses med d'instrucziun «Allegra rumantsch» per tals dal stgalim superiur en la Bassa che vulan emprender d'enconuscher noss linguatg. Dals 600 exemplars – realisads en collavuraziun cun la Chasa editura Klett – èn ca. 500 vendids. – Buns contacts tgira la PSR cun la Agen-tura da novitads rumantscha (anr) ch'era la PSR ha gidà a realisar e che presta oz lavur publicistica considerabla per La Quotidiana.

## Rendaquint per dus onns

L'entrada principala da la PSR èn las contribuziuns annualas dals ca. 300 comembers. Cunquai che la radunanza annuala da 2012 n'ha betg gi lieu èsi stà da render quint per dus onns. Quel per 2011 ha serrà cun in gudogn da 1900

francs tar entradas da 9000 francs, fer-tant che quel da l'onn passà registrescha in bene dad 870 francs cun entradas dad 8500 francs. La facultad da la PSR mun-tava per la fin da 2012 a 48 200 francs.

Il preventiv per quest onn quinta cun ina sperdita da 2300 francs. Las expensas principals èn quellas per il champ da vacanzas ed alur per ina nova pagina da cumparsa sin l'internet. Las contribu-ziuns annualas restan sco fin ussa: 30 francs per singuls, 50 francs per famiglias e 120 francs per personas giuridicas.

## Engraziament al parsura partent

Il suprastant David Carigiet engrazia fitg al president partent Arno Berther per ses ferm engaschi a pro da la PSR e la buna ed empernavla collavuraziun.